

- राष्ट्रपति द्रौपदी मुर्मू राजस्थान री तीन प्रतिभावां समेत 66 हस्तियां ने पद्म पुरस्कार ऊं नवाजा।
- मुख्यमंत्री भजनलाल शर्मा आज टोंक जिला रा बीसलपुर बंधा ऊं 'वंदे गंगा जल संरक्षण-जन अभियान' सरु कीनो।
- केन्द्रीय गृहमंत्री अमित शाह दो दिन रा बीकानेर दौरा सारु आज पधारेला-काल सांचू सीमा चौकी माथे प्रहरी सम्मेलन मांय शामिल व्हेवण रो कार्यक्रम।
- नौतपा सरु व्हेवण सागे ई प्रदेश मांय गर्मी रो जोर और बध्यो।

000

राष्ट्रपति द्रौपदी मुर्मू आज राजस्थान री तीन प्रतिभावां समेत 66 हस्तियां ने पद्म पुरस्कार दे र नवाजा। ई साल रा पहला नागरिक अलंकरण समारोह मांय दो ने पद्म विभूषण, छह ने पद्म भूषण अर 58 हस्तियां ने पद्मश्री मान ऊं नवाजी ज्या। देवलोक व्हा फिल्म अभिनेता धर्मेन्द्र सिंह देओल ने कला रा हलका मांय योगदान सारु पद्म विभूषण ऊं नवाजी ज्या। वायलिन बजावण वाळा दिग्गज उस्ताद डॉ. एन. राजम ने ई पद्म विभूषण ऊं सम्मानित करी ज्या। पद्म श्री ऊं नवाजी जावण वाळी हस्तियां मांय प्रदेश रा भपंग वादक गफरुद्दीन मेवाती, समाज सेवक स्वामी ब्रह्मदेव महाराज अर अलगोजा बजावण वाळा तगाराम भील ई शामिल है।

000

17 अप्रैल, 1960 ने मूलसागर गांव मांय जन्म्या तगा राम ढांढा चराता थकां वां रा पिताजी ऊं 7 साल री उम्र मांय अलगोजा बजावण री सीख लेवणो सरु कीनो। तगा राम उस्ताद अकबर खान ऊं आला दर्जा री सिखावण हासिल कीनी। वे डेजर्ट फेस्टिवल अर जैसलमेर कैमल फेस्टिवल समेत न्यारा-न्यारा मौकां माथे कला रो दरसाव कीनो। तगाराम पर्यटन विभाग री ओर ऊं न्यारा-न्यारा देशां मांय राख्यी ज्या कार्यकमां मांय कला रा रंग बिखेर्या। वां ने राजस्थान पर्यटन विभाग समेत न्यारी-न्यारी संस्थावां कानी ऊं नवाजी ज्या है। राष्ट्रपति भवन मांय राख्यी ज्या जळसा मांय उपराष्ट्रपति सी.पी. राधाकृष्णन अर प्रधानमंत्री नरेंद्र मोदी समेत केई केन्द्रीय मंत्री अर मान्योडा लोग मौजूद रह्या। ध्यानजोग है के साल 2026 सारु 131 पद्म पुरस्कार दिया जावणा है, ज्यां मांय पांच पद्म विभूषण, 13 पद्म भूषण अर 113 पद्म श्री पुरस्कार शामिल है। मान जळसा रा दूजा दौर मांय और हस्तियां ने पद्म पुरस्कार ऊं नवाजी जावेला।

000

मुख्यमंत्री भजनलाल शर्मा आज गंगा दशमी रे मौके टोंक जिला रा बीसलपुर बंधा ऊं 'वंदे गंगा जल संरक्षण-जन अभियान' सरु कीनो। मुख्यमंत्री बीसलपुर बंधा माथे रीति-रिवाज ऊं जल पूजन कीनो। ई मौके वे कह्यो के पाणी जिन्दगी री बुनियाद है अर इण ने बचावण सारु आ खास पहल है। मुख्यमंत्री जनता ऊं ई अभियान मांय शामिल व्हे र पाणी बचावण री मुहिम ने सफल बनावण री अपील कीनी।

000

मुख्यमंत्री ईसरदा बंधा रो ई हवाई सर्वे कर र पाणी ने बचावण, वां रा प्रबंधन अर पाणत ऊं जुडी परियोजनावां रा कामां रो जायजो लीनो। ध्यानजोग है के रामजल सेतु लिंक परियोजना रो फीडर चैनल तीन खास बंधा ईसरदा, गलवा अर बंध बारेठा ऊं निकळे है। मुख्यमंत्री भरतपुर रा बंध बारेठा बंधा माथे ई जल पूजन कर र अभियान री सरुआत कीनी। ई मौके वे राज्य मांय पाणी बचावण अर पारम्परिक जल स्रोतां ने और बेहतर बनावण रो

राज्य सरकार रो वायदो दोहरायो। प्रदेश रा न्यारा-न्यारा जिलां मांय ई 'वंदे गंगा जल संरक्षण-जन अभियान' रा तैत केई कार्यक्रम राखी ज्या। ऊर्जा मंत्री हीरा लाल नागर कोटा जिला रा सांगोद मांय, देवस्थान मंत्री जोराराम कुमावत पाली मांय, विधायक राजेंद्र भांबू झुंझुनू मांय अर विधायक शैलेश सिंह डीग मांय ई अभियान री सरूआत कीनी। हनुमानगढ़ रा लखुवाली हैड, बारां रा मनिहारा तळाव, डूंगरपुर मांय गेपसागर री पाल, बांसवाड़ा रा माही माता मिन्दर अर सिराही अर बालोतरा समेत न्यारी-न्यारी ठौड़ां पाणी बचावण ऊं जुड्या खास कार्यक्रम राखी ज्या। ई मौके जनता ने पाणी बचावण री शपथ ई दिराई ज्यी। ध्यानजोग है के ई अभियान रा तैत 5 जून ताई आखा राज्य मांय पाणी बचावण ऊं जुड्या खास कार्यक्रम राख्या जावेला। गांवां मांय कूड़ा-बावड़ियां, तळावां अर पाणी रा दूजा स्त्रोतां री साफ-सफाई, जल चौपाल, प्रभात फेरी अर पौधा रोपण सरीखा कार्यक्रम राख्या जावेला।

000

अमेरिका रा विदेश मंत्री मार्को रूबियो वां री जोड़ायत सागे आज जयपुर पधार्या। आमेर महल रा जलेब चौक मांय वां रो राजस्थानी अंदाज मांय स्वागत करी ज्यो। वां रा स्वागत मांय लोक कलाकार घूमर, कालबेलिया अर कच्छी घोड़ी रा नाच पेश कीना। वां ने आमेर रा शीश महल, गणेश पोल, दीवान-ए-आम, दीवान-ए-खास, सुख निवास अर मावठा झील रा बारा मांय जाणकारी दीरीजी।

000

केन्द्रीय सड़क परिवहन अर राजमार्ग मंत्री नितिन गडकरी आज राजस्थान मांय 10 हजार किलोमीटर ऊं बत्ता लम्बा नेशनल हाई-वे रा हालात रो जायजो लीनो। वे टिकारू अर कुशल हाई-वे बणावण सारू टेमसर परियोजना बणावण, करड़ा गुणवत्ता मानकां री पालना अर उन्नत प्रौद्योगिकी रा एका रा महत्त्व माथे जोर दीनो।

000

केन्द्रीय गृहमंत्री अमित शाह रो बीकानेर रा दो दिन रा दौरा सारू आज रात बीकानेर रा नाल हवाई अड्डा पूगण रो कार्यक्रम है। श्री शाह काल सांचू सीमा चौकी माथे राख्या जावण वाळा प्रहरी सम्मेलन मांय शामिल व्हेला। ई दौरान वे महिला बैरकां रो ई-उदघाटन करेला। ई पाछे गृहमंत्री बीएसएफ सेक्टर मुख्यालय मांय अहलकारां सागे सरहदी हलकां री हिफाजत अर विकास रा बारा मांय मीटिंग करेला। वां रो बी.एस.एफ. जवानां सागे ई बातचीत रो ई कार्यक्रम है। गृहमंत्री रा प्रस्तावित दौरा ने ध्यान राखता थकां मुख्यमंत्री भजनलाल शर्मा ई अब ऊं थोड़ी देर पछे बीकानेर पूग रह्या है। इण ऊं पैली मुख्य सचिव वी. श्रीनिवास बीकानेर पूग र गृहमंत्री रा दौरा री तैयारियां रो जायजो लीनो।

000

राष्ट्रीय मुक्त विद्यालयी शिक्षा संस्थान री ऑन-डिमांड परीक्षा प्रणाली रा तैत राज्य मांय परीक्षा केंद्रां री तादाद बधायी ज्यी है। संस्थान रा क्षेत्रीय कार्यालय जयपुर रे मुजब बूंदी अर सीकर मांय दो नुवा ऑन-डिमांड एग्जामिनेशन सेंटर खोली ज्या है। राज्य मांय फिलहाल जयपुर, कोटा, बीकानेर अर उदयपुर मांय ऑन-डिमांड परीक्षा केंद्र है।

000

प्रदेश रा घणखर हलकां मांय आज लू बाजी। नौतपा री सरूआत रा पहला दिन ई कुछ जिलां मांय दिन री बगत पारो 45 डिग्री सेल्सियस ने पार कर ग्यो। जैसलमेर, बाड़मेर अर बालोतरा समेत सरहद रा केई जिला अर राज्य रा ऊगणी हलकां मांय लू रे कारण दोपहरां री बगत बाजारां मांय अर सड़कां माथे आवाजाही कम रही। म्हाणा बाड़मेर खबरनवीस बतायो के तेज तावड़ा रे कारण मिनखा सागे जिनावरां अर परिन्दां ने ई घणी परेशानी व्हे रही है।

000

मौसम केंद्र जयपुर रे मुजब राज्य मांय आवता चार-पांच दिन लू रा थपेड़ा लागता रहवेला । काल जैसलमेर अर बालोतरा मांय लू रो ऑरेंज अलर्ट जारी करी ज्यो है, जद के 18 दूजा ज़िलां सारू येलो अलर्ट जारी करी ज्यो है । मौसम विभाग रे मुजब ई महीना रा आखिर मांय कठे-कठे आंधी चालण सागे छांटो-छिड़को व्हेवण रा आसार है । ई बीचे स्वास्थ्य रा जाणकार जनता ऊं तेज तावड़ा मांय नी जावण, पूरो पाणी पीवण अर बच्चां अर बुजुर्गा रो खास ध्यान राखण री राय दीनी है ।

राष्ट्रीय आयुर्वेद संस्थान, जयपुर रा डॉक्टर राकेश नागर आकाशवाणी ने बतायो के ज़ोरदार गर्मी रे दौरान शरीर मांय पाणी री पूर्ति रो खास ध्यान राखणो चाहिजे ।

000

रेलवे गर्मी री छुट्टियां मांय मुसाफिरां रा सुबीता सारू गुजरात रा भावनगर टर्मिनस अर दिल्ली रा शकूरबस्ती बीचे हर सप्ताह खास गाड़ी चलावण रो फ़ैसलो कीनो है । उत्तर-पश्चिम रेलवे रा मुख्य जनसंपर्क अधिकारी अमित सुदर्शन आ जाणकारी दीनी । वे बतायो के आ गाड़ी 29 मई ऊं 27 जून ताई हर हफ़ता चलायी जावेला । आ रेलगाड़ी आबूरोड, फालना, मारवाड जंक्शन, अजमेर, किशनगढ़, फुलेरा, रींगस, नीमकाथाना, नारनौल, रेवाड़ी, गुड़गांव अर दिल्ली कैंट व्हेती जावेला ।

000

वरिष्ठ नागरिक तीर्थ यात्रा योजना रा तैत ऑनलाइन अर्जी देवण सारू पोर्टल काल 15 दिन सारू खोल्यो जावेला । देवस्थान अर पशुपालन मंत्री जोराराम कुमावत आज पाली मांय आ जाणकारी दीनी । वे बतायो के योजना रा तैत बुजुर्गा ने रेल अर हवाई जहाज रे जरिए मुफ़्त तीरथ करायो जावेला ।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 31 मई ने विचार बतावेला । आ ई कार्यक्रम री 134वीं कड़ी व्हेला । ई सारू आप ई मुफ़्त नम्बर 1800-11-7800 माथे 29 मई ताई राय दे सको हो । नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है ।

000